

आकाशवाणी

खास-खास खबरां:-

- प्रधानमंत्री नरेन्द्र मोदी तारे अज्ज ब्राजील दे राष्ट्रपति लूला डा सिल्वा हुंदे नै नमीं दिल्ली च दपक्खी गल्लबात करगंन।
- प्रधानमंत्री हुंदा अज्ज वीडियो कांफ्रेंसिंग राएं उत्तर प्रदेश च HCL-Fox Conn परियोजना दा उदघाटन करने दा कार्यक्रम ऐ।
- भारत ए.आई इम्पैक्ट शिखर सम्मेलन 2026 नमीं दिल्ली च सम्पन्न- पूरी दुनिया नै भारत दे ए.आई गी लेइयै जिम्मेदारी आहले नजरिए दी सराहना कीती।
- अमरीकी राष्ट्रपति डोनाल्ड ट्रम्प होरें आखेया ऐ जे सुप्रीम कोर्ट दे फैसले दे बावजूद भारत-अमरीका बपार समझौता बरकरार रौहग।
- आई.सी.सी. टी-20 विश्व कप दे सुपर-8 स्टेज दे मकाबले अज्ज शुरु होआ"रदे न। शुरुआती मैच न्यूजीलैंड ते पाकिस्तान बश्कार होग।

<><><><><><>

PM Brazil

प्रधानमंत्री नरेन्द्र मोदी ते ब्राजील दे राष्ट्रपति लुई इनासियो लूला दा सिल्वा अज्ज नमीं दिल्ली च दपक्खी गल्लबात करगंन। ओह दपक्खी सरबंधें दे सारे पैहलुएं दी समीक्षा करगंन। दवै नेता बहुपक्खी मंचें च सहयोग- वैश्विक शासन ते ग्लोबल साउथ कन्नै सरबंधित मुद्दें सनें आपसी हित दे क्षेत्रीय ते वैश्विक मुद्दें पर बी विचार-विमर्श करगंन।

<><><><><><>

PM Foxconn

प्रधानमंत्री नरेन्द्र मोदी अज्ज वीडियो कांफ्रेंस दे राए उत्तर प्रदेश दे यमुना एक्सप्रेस-वे उद्योगिक विकास प्राधीकरण च HCL-Fox Conn सांझी उद्यम परियोजना दे नीह पत्थर रक्खने आहले कार्यक्रम च हिस्सा लैगंन। एह परियोजना घरेलू विनिर्माण क्षमताएं गी मजबूत करने- आयात पर निर्भरता घट्ट करने ते मजबूत वैश्विक आपूर्ति श्रृंखलाएं दे निर्माण आस्तै सरकार दे जत्नें दे मूजब ऐ।

इस सुविधा कन्ने इंजीनियर-तकनीशियन ते पेशेवर लोकें आस्तै प्रतक्ख ते अप्रतक्ख तौर पर रोजगार दे मौके पैदा होने दी मेद ऐ। HCL फॉक्सकॉन सेमीकंडक्टर इकाई दी स्थापना भारत दी तकनीकी आत्मनिर्भरता दी यात्रा च इक महत्वपूर्ण उपलब्धी ऐ ते उच्च स्तरीय इ लैक्ट्रॉनिकी ते सेमीकंडक्टर विनिर्माण आस्तै भारत गी इक भरोसेमंद वैश्विक थाहर दे तौरा पर कायम करने दे प्रधानमंत्री हुंदे नजरिए गी दर्शादी ऐ।

<><><><><><>

AI Summit Concludes

भारत ए.आई. इम्पैक्ट शिखर सम्मेलन 2026 कल नमीं दिल्ली दे भारत मंडपम च सम्पन्न होआ। इस शिखर सम्मेलन च भारत दे जिम्मेदार ए.आई आहले नजरिए गी सारे मुल्खें दा समर्थन थोआ। नमीं दिल्ली च कल संवाददाताएं कन्ने गल्लबात करदे होई इलैक्ट्रॉनिक्स ते आई.टी मंत्री अश्विनी वैष्णव होरें आखेया जे “ए.आई इम्पैक्ट शिखर सम्मेलन 2026” केई मायने च बड़ा मता कामयाब रेहा। उंनं दस्सेया जे 5 लक्ख कोला मते लोकें इस प्रदर्शनी गी दिक्खेया- मता किश सिक्खेया जे दुनिया भरै दे केई माहिरें ते तर्जुबेकारें लोकें कन्ने गल्लबात कीती। उंनं दस्सेया कि दुनिया दे लगभग सब्भै प्रमुख ए.आई क्षेत्र दे खडारियें बड़ी बदद गिनतरी च हिस्सा लैता। वैष्णव होरें आखेया जे केई स्टार्ट-अप्स गी अपने कम्मै गी सारे सामने रक्खेन दा मौका थोआ। उंनं दस्सेया जे केई निवेशकें इत्थे रासपूंजी लाने दी दिलचस्पी दस्सी ऐ- जेहड़ी 250 अरब डालर ते वेंचर कैपिटल दे तैहत डीप टैक निवेशकें लेई लगभग 20 अरब डालर कोला मती ऐ

<><><><><><>

PM-Man Ki Baat

प्रधानमंत्री नरेन्द्र मोदी होर कल बड़्डलै 11 बजे आकाशवाणी पर हर महीने प्रसारित होने आले कार्यक्रम मन की बात राएं लोकें कन्ने अपने विचार सांझा करगंन। ए इस महावार रेडियो कार्यक्रम दी 131मीं किशत होग। एह कार्यक्रम आकाशवाणी ते दूरदर्शन दे समूलचे नैटवर्क AIR समाचार- डी.डी. न्यूज-AIR समाचार दी वैबसाईट-AIR दी मोबाईल ऐप्प पर बी प्रसारित कीता जाग।

एदे कन्नो-कन्नी ए प्रधानमंत्री हुंदे दफ्तर ते सूचना ते प्रसारण मंत्रालय दे यूट्यूब चैनल पर बी प्रसारित कीता जाग। आकाशवाणी पर इस दे हिंदी प्रसारण मगरा क्षेत्रीय भाषाएं च प्रसारण कीता जाग।

<><><><><><>

SC WB

सुप्रीम कोर्ट नै मतदाता सूचिये दी व्यापक ते गैहन नजरसानी एस.आई.आर प्रक्रिया दौरान हिंसा ते राजनीतिक दखल गी लेइयै पच्छिम बंगाल दे पुलस महानिदेशक डी.जी.पी गी चेतावनी दिती ऐ। अदालतें आखेया जे जेकर डी.जी.पी राजनीतिक नेताएं दी आपत्तिजनक टिप्पणियें खिलाफ कोई गेंस नैई पुटदा ऐ- तां भविक्ख च उन्दे खिलाफ सख्त कारवाई कीती जाग। अगली सुनवाई च डी.जी.पी गी हासिल शकैतें दे परते च पुट्टी गेदी गेंस दी रिपोर्ट देनी होग। मामले दी सुनवाई अगले महीने फही होग।

<><><><><><>

Railway JK

उत्तर रेलवे नै बडगाम ते श्री माता वैष्णो देवी कटरा बश्कार चलने आहली विशेष रेल गड्डी दा संचालन 2 जुलाई तगर बदाई दिता ऐ- तां जे जम्मू संभाग च यात्रियें गी होर सहूलत होई सकै ते कश्मीर कन्नै सम्पर्क बेहतर बनाया जाई सकै। बडगाम ते श्री माता वैष्णो देवी, कटरा बश्कार चलने आहली रेलगड्डी नम्बर 04688 ते 04687 दी सेवा हुन 4 मार्च थमां 2 जुलाई तगर जारी रहोग ते एहदे संचालन दे मौजूदा कार्यक्रम च कोई बी तब्दीली नैई कीती जाग।

<><><><><><>

US Tariff- India

अमरीकी राष्ट्रपति डोनाल्ड ट्रम्प होरें अमरीकी सुप्रीम कोर्ट दे फैसले दी पछोकड़ै च आखेया ऐ जे भारत कन्नै होए दे बपार समझौते च इस फैसले कन्नै कोई बदलाव नैई होग ते एह डील जारी रौहग। ट्रम्प होरें आखेया जे अमरीका दे भारत कन्नै सरबंधत बड़े शानदार न ते भारत कन्नै बपार ओ जारी रखगंन।

अमरीकी राष्ट्रपति होंरें एह गल्ल जंदी रातीं व्हाईट हाउस च आयोजित इक प्रैस कांफ्रेंस च आखी-जेड़ी सुप्रीम कोर्ट आसेया बक्ख-बक्ख मुल्खें पर लाए गेदे अमरीकी टैक्सें च बाददे गी वापस लैने दे फैसले दे बाद सददी गेदी ही।

<><><><><><>

Trump SC Tariff-

अमरीका दे राष्ट्रपति डोनाल्ड ट्रम्प होंरें आखेया ऐ जे सुप्रीम कोर्ट आसेया उं'दे केंई बुनियादी टैक्स प्रस्तावें गी रद्द करने दे बाद ओ वैकल्पिक कनूने दा इस्तमाल करदे होई इक नमा वैश्विक टैक्स लागंन- जेहड़ा 10 प्रतिशत दे साब्बै होग। ट्रम्प होंरें उ'नें जजें लेई अफसोस प्रगट कीता- जिनें उं'दे टैक्स प्रस्तावें गी रद्द करने लेई मतदान कीता। उ'नें इस फैसले गी बड़ा मंदे भागे आहला फैसला करार दिता।

<><><><><><>

White House- India Tariff

व्हाईट हाउस नै एह गल्ल साफ कीती ऐ जे अमरीका दे राष्ट्रपति डोनाल्ड ट्रम्प हुंदे आसेया नमें वैश्विक टैरिफ दी घोषणा दे बाद भारत गी आरजी तौरा पर 10 प्रतिशत टैरिफ दा सामना करना पौंग। दफा 122 तैहत घोषत 10 प्रतिशत दा एह नमां टैरिफ कोई बाददू टैक्स नेंई ऐ- सगुआं एह पैहले दे अंतराष्ट्रीय अपातकालीन आर्थिक शक्ति अधिनियम पर आधारित टैक्सें दी थाहर लैग- जिनेंगी सुप्रीम कोर्ट नै रद्द करी दिता हा। मजूदा बवस्था अमरीकी अदालत आसेया लाई गेदियें कनूनी पाबंदियें ते मतवादत वैधानिक बवस्थाएं दे राएं कारवाई जारी रक्खने दे प्रशासन दे घोषित इरादें गी दर्शादा ऐ।

<><><><><><>

MEA- India US Trade

विदेश मंत्रालय नै आखेया ऐ जे भारत ते अमरीका हाल च अपनाए गेदे सांझे ब्यान मताबक सांझे तौरा पर लाहकारी बपार समझोतें गी खीरी शकल देने लेई कम्म करा करदे न।

नर्मि दिल्ली च मीडिया गी सम्बोधत करदे होई मंत्रालय दे प्रवक्ता रणधीर जायसवाल होरें आखेया जे मुख वार्ताकार दी अगुआई च भारत दा इक प्रतिनिधिमंडल अगले हफते अमरीका दा दौरा करोग।

<><><><><><>

JK Budget Session

जम्मू-कश्मीर विधानसभा दे बजट इजलास दा पैहला गेड़ कल सम्पन्न होई गया। स्पीकर अब्दुल रहीम राथर होरें ऐलान कीता जे 2026-27 आले बजट लेई विनियोग विधेयक गी पास करने गितै औंटी 27 मार्च गी विधानसभा दी बैठक परतियै लग्गोग। नमें माली ब'रे दौरान सरकारी खर्च गी औपचारिक तौर पर मंजूरी देने लेई इस बिल दा पास होना मता जरूरी ऐ।

<><><><><><>

Cricket T-20 WC

आई.सी.सी. टी-20 क्रिकेट विश्व कप च सुपर-8 गेड़ दे मुकाबले अज्जै थमां शुरु होआ'रदे न। अज्ज न्यूजीलैंड दा मुकाबला पाकिस्तान कन्नै कोलम्बो दे आर. प्रेमादासा स्टेडियम च होग। एह मुकाबला भारतीय समें मूजब संजा 7 बजे शुरु होग। तोंआई भारत सुपर-8 च अपना पैहला मैच कल दक्खन अफ्रीका खिलाफ अहमदाबाद दे नरेन्द्र मोदी स्टेडियम च खेडेया जाग।

<><><><><><>

IMD

मौसम विभाग नै अगले 2 दिनें दौरान तमिनाडू- पुडुचेरी- कराईकल- केरल ते माहे च मोलाधार बरखा- गरज ते बिजली पौने दी शँका कन्नै तेज हवा चलने दे असार दस्से न। विभाग नै दस्सेया जे दक्खन आंतरिक कर्नाटक च बी ऐसी गै स्थिति रहोग। कन्नै गै अगले 2 दिनें च उत्तर-पच्छम भारत- मध्य भारत- गुजरात ते महाराष्ट्र च बद्दोबद्द तापमान च 2 थमां 4 डिग्री सैलसियम दा बाददा होग। विभाग नै अज्ज दक्खन-पच्छम बंगाल दी खाड़ी दे किश हिस्सें ते कोमेरिन क्षेत्र दे किश हिस्सें च तूफानी मौसम रौहने दी संभावना जाहिर कीती।

<><><><><><>